



KOMUNIKADO PA PRENSA

Fecha
7 Augustus 2013

Email
jhanirha.anita@gobiernu.cw

Nr.

MINISTER BALBORDA TA INSTITUI TIM DI MANEHO NOBO NA SERVISIO PA PLANIFIKASHON URBANO (ROP)

Willemstad – Awe merdia, Minister Earl Albordá di Ministerio di Tráfiko, Transporte i Planifikashon Urbano a laga staf i personal di Servisio pa Planifikashon Urbano, ROP (antes DROV) sera konosí ku e tim di maneho nobo pa e servisio. E tim aki ta konsisti di 4 miembro ku ta: Sr. Lionel Janga, Sr. Darwin de Lanoi, Sr. Liorgo Rosa i Sra. Agneta Janga. Despues di un periodo intensivo pa buska e mihó solushon pa maneho di ROP, a skohe e tim aki pa traha huntu na adelanto di ROP. Kada un miembro di e tim ta enkarga ku un departamentu.

Den sektor di Infrastruktura i Planifikashon Urbano di Ministerio di Trafiko, Transporte i Planifikashon Urbano, ROP ta responsabel pa garantisá uso balansá di teritorio di Kòrsou i evaluá tur proposishon di desaroyonan urbano i rural nobo i tur desaroyo aktual pa garantisá ku esakinan ta sosodé di akuerdo ku lei. Di e forma aki gobièrnu ta sòru pa tur proyekto ta di kalidat haltu.

Responsabilidad di e organisashon akí ta pa diseñá i duna forma na e espasio di Kòrsou. Algun di e tareanan di ROP ta planifikashon urbano, renovashon di áreanan residencial, bibienda, i preparashon di proyektonan pa desaroyo di sentro di suidat. Kuido di monumento tambe ta un tarea importante di ROP.

Banda di tur esaki ROP ta kolabora ku ‘Domeinbeheer’ pa loke ta trata terenonan di gobièrnu. Den e kuadro aki, ROP ta koordiná e parti tékniko di preparashon di tereno pa konstrukshon. Finalmente, ROP ta kontrolá i ehekutá lei den kuadro di konstrukshon i ta hasi inspekshon.

Minister Albordá ta konvensi ku e tim di maneho aki lo duna resultadonan satisfaktorio i yuda e organisashon aki bai dilanti. Pueblo di Kòrsou por sigui tur último desaroyonan di Minister Albordá di Tráfiko, Transporte i Planifikashon Urbano via di su página di Facebook ‘Earl W. Albordá, Minister VVRP’.